

# INUIT ATAQATIGIIT

## Inatsisartuni



UPA 2019/59  
30-04-2019  
Mimi Karlsen

**Meeqqat aturfiani digitalimut piorsanerup taamatullu digitalimik atunerup immikkutilinniartitsissutigineqartalernissaat anguniarlugu inatsisissamut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliamuttassunga atatillugu Naalakkersuisut attavigissavaat Institut for Læring aamma kommunit siunertarlugu UV-mut atortunik naapertuuttunik ineriartortitsinissaq aamma ilinniartitsisutut ilinniagaqareersutilinniaqqissinnaanissaat.**

(Inatsisartunut ilaasortaq Randi Vestergaard Evaldsen, Demokraatit)

Inuit Ataqatigiit Inatsisartunut ilaasortap Randi Vestergaard Evaldsenip, Demokraatit, aalajangiiffigisassatut siunnersuutaat qujassutigaput. Siunnersuuteqartoq isumaqatigilluinnarparput meeqqat inuusuttullu digitalimik nalinginnaasumik ilisimasaqalernissaasa atuilluarsinnaalernissaallu pingaartitariaqaratsigu. Meerarpassuaqarpoq angajoqqaaminnit suulluutik qarasaasiamik atuilersimasunik. Ilaatigut angajoqqaat qarasaasiamik atuinngitsut meeqqat atuilersarput. Nalinginnaavorlu angajoqqaat meeqqaminnut ilitsersuisuusartut, matumanili angajoqqaat qarasaasiamik atuisuunngikkunik meeqqat ilitsersuussinnaanngilaat, malinnaaffigisinnaanngilaat illersorsinnaanngilaalluunniit. Taamaammatt pisariaqarpoq meeqqat aturfiani qarasaasialerinemik ilinniartitsisarnissaq.

Qarasaasiamik atuneq atuartitsissummi sumiluunniit ingerlanneqartariaqarpoq. Nalinginaasutut atortussiatut qarasaasiaq atorneqartariaqarpoq.

Taamaammatt meeqqat aturfiani I-pad, pc allallu atorneri teknikkikkuinnaanngitsoq, aammali internetsimi pissuserissaarneq, mianersornerlu meeqqat aturfianni pingaartinneqartariaqarpoq.

Meeqqat aturfiani immikkut sammisaqarsinnaaneq periarfissaajuaannarpoq. Atuartitsissutini nalinginnaasuni it-lerineq naammanngippat, taava immikkut sammineqarsinnaavoq.

Taamaammatt immikkut atuartitsissutigingikkaluarlugu meeqqat aturfiini it-lerinerup sammineqarluartarnissaa inassutigigatsigu Naalakkersuisut allannguutissatut siunnersuutaat tusaatissatut tigussavarput.